

Capitulu 11

Induve Tistù decide d'aiutà u duttore Mauxdivers

Ghjè visitendu l'uspidale chì Tistù fece a cunniscenza di a zitelletta malata.

L'uspidale di Mirepoil, per via di a generosità di u Sgiò Babbu, era un bellu uspidale, grandissimu, pulitu è duttatu di tuttu ciò ch'ellu ci vulia per curà i malati. Larghe finestre lasciavanu entre u sole ; i muri eranu bianchi è luccichenti. Tistù ùn trovò micca chì l'uspidale era goffu, manc' appena. E puru, sintì ... cumu spiecà la ?... sintì ch'ellu ci si piattava qualcosa di tristu.

U duttore Mauxdivers, capimachja di l'uspidale, era omu assai struitu è bonu. Si vidia subito à u primu sguardu. Tistù trovò ch'ellu s'assumigliava à pena à u giardinaru Mustaccione, un Mustaccione senza mustacci è chì averia purtatu spechjtoni in scaglia. Tistù à li disse.

– Sta sumiglia vene forse, rispose u duttore Mouxdivers, da chì Mustaccione ed eiu ci occupemu tramindui di curà a vita. Mustaccione cura a vita di i fiori ed eiu curu a vita di a ghjente.

Ma curà a vita di a ghjente era assai più difficiule ; Tistù capì prestu stendu à sente u duttore Mouxdivers. Esse duttore, era luttà senza riposu. D'un latu ci era a malatia, sempre pronta à entre in lu corpu di a ghjente, è da l'altu a salute, sempre pronta à parte. In più, c'era mille generi di malatie è una sola bona salute. A malatia si mettia ogni spezia di mascara da chì omu ùn la ricunoschi ; un veru Marti Grassu. Ci vulia à truvà la, scurasgì la, caccià la è à tempu attrae a salute, tene la stretta, impedì la di fughje.

– Sì digià statu malatu, o Tistù ? dumandò u duttore Mouxdivers.

– Innò mai.

– Da veru ?

Di fatti u duttore si ramintò ch'ellu ùn era mai statu chjamatu per curà à Tistù. A Signora Mamma avia à spessu pene in capu ; u Sgìò

Babbu patia qualchì volta di u stomacu. L'invernu scorsu, u servu Carolus, avia chjappu una puntura. Tistù nunda. Eccu un zitellu chì dapoì a so nascita, ùn avia cunnisciutu a minima varicella* u minimu vaghjolu latinu, a minima ansgina, u minimu cataru. Un casu scarsu di bona salute, un casu, un casu eccezzionale.

– Vi ringraziu tantu, o sgiò duttore di dà mi sta lezziò, m'interessa assai, disse Tistù.

U duttore Mauxdivers mustrò à Tistù a sala duve omu appruntava e piccule pillule rosule contru à a tossa, l'unguente** giallu contru à i brisgioli, e polvere bianche contru à a frebba. Li mustrò a sala duve ellu si po guardà à traversu à u corpu d'una persona, cum'è à traversu à una finestra, per vede induve a malatia si piatta, è ancu a sala, incù i spechji à u suffittu, duve lu si guarisce l'appindicita è tante cose chì minaccianu a vita.

« Postu chì quì omu impedisce u male di passà, tuttu duveria esse giocondu è felice,

* varicelle

** la pommade

si dicia Tistù. Induve si piattarà issa tristezza ch'eo risentu ?... »

U duttore aprì a porta di a camera occupatu da a zitelluccia malata.

– Ti lasciu Tistù, passerai dopu à truvà mi in lu mio scagnu, disse u duttore Mauxdivers.

Tistù entrì.

– Salute, disse Tistù à a zitelletta malata.

Li parse cusì bella, ma assai palita. I so capelli currianu, neri, nantu à u cuscinu. Avia à pocu pressu a listessa età chè Tistù.

– Salute, li rispose incù pulitezza senza move u capu

I so ochji fissavanu u suffittu.

Tistù pusò à cantu à u lettu, u so cappellu biancu nantu à e dinochje.

– U duttore Mauxdivers m'hà dettu chì e to anche ùn viaghjavanu micca. Vanu megliu da poi chè tù sì qui ?

– Innò rispose a zitelletta sempre incù listessa pulitezza, ma què ùn hà primura.

– Perchè ? Dumandò Tistù.

– Perchè chì ùn aghju nisun locu duve andà.

– Eiu aghju un giardinu, disse Tistù per di qualcosa.

– Sì furtunatu. S’eo avia un giardinu, forse chì averia u laziu di guarisce per andà ci à spassighjà.

Tistù fighjulò subitui so ditoni. « S’ella basta què per fà li piacè... »

Li dumandò dinù :

– Ùn t’annoii micca troppu ?

– Innò micca troppu. Fideghju u suffittu. Contu e piccule sgrignature ch’ellu ci hè dentru.

« Qualchì fiori sarianu megliu » pensò Tistù. E si messe à chjamà in sè : « Pampasgioli, pampasgioli ! valculi*, pratelline** ghjunchiglie*** ! »

E grane entrinu forse per a finestra, o forse chì Tistù l’avia purtate sottu à i so scarpi.

– Ùn sì micca infelice o mancu ?

– Per sapè s’omu hè infelice, rispose a zitelluccia, ci vole prima à esse statu felice. Eiu sò nata malata.

* boutons d’or

** pâquerettes

*** jonquilles

Tistù capì chì a tristezza di l'uspidale si piatava indù sta camara, in lu capu di a zitelletta. Ne diventava tristu anch'ellu.

– Visite ne ricevi ?

– Assai. A matina nanzu à u sdighjunu, vecu a surella-termometru. È po dopu vene u duttore Mauxdivers ; hè veramente bravu, mi parla pianu pianu è mi dà un bumbò. À l'ora di cullazzione, tocca à a surella pillule ; poi, incù u mio spuntinu, vecu entre a surella di e piccature chì facenu male. È dopu scala un omu in biancu chì pritende chì e mio anche vanu megliu. E si leia incù una funicella per fà le move. Tutti, dicenu chè aghju da guarri. Ma eiu, fideghju u suffittu ; ellu, o mancu, ùn mi ne conta bugie.

Mentre ch'ella parlava, Tistù s'era pisatu è s'affacendava in giru à u lettu.

« Pensava, pè guarisce, sta zitelletta ci vole ch'ella brami di vede un lindumane, hè bella chè capita. Un fiore, incù a so manera di sfuglià si, di creà surprise, puderia forse aiutà la. Un fiore chì cresce, hè una vera induvinella, chì ricummencia ogni matina. Un ghjornu sgrigna

un bocciulu, u ghjornu dopu sgrunchja* una fronda verde cum'è una piccula granochja, è po dopu sbuglineghja un pètalù... Aspettendu ogni ghjornu a sorpresa, forse chì sta zitelluccia si scurdarà di a so malatia... »

I ditoni di Tistù ùn piantavanu una stonda.

– Eiu, credu chè tù ai da guarrì disse Tistù.

– A credi ancu tù.

– Iè à ti possu dì. Avvedeci.

– Avvedeci, rispose a ziteletta malata. Sì fortunatu tù d'avè un giardinu.

U duttore Mauxdivers aspettava à Tistù daretu à u so scagnone luccicante, tracarcu di libroni.

– Allora o Tistù, chì ai amparatu oghje ? Chì sai di a medicina ?

– Tistù rispose, aghju amparatu chì a medicina ùn pò tante cose contru à un core tristu. Aghju amparatu chì per guarrì, ci vole à avè a brama di campà. O sgiò duttore, pillule per dà a speranza ci n'hè ?

U duttore Mauxdivers fù stunatu di scuntrà tanta saviezza indù un zitellucciu.

* défroisser

– Ai amparatu da per tè, solu solu, u primu affare chì un duttore deve sapè.

– È u secondu o Sgiò duttore ?

– u secondu ghjè chì per curà a ghjente, ci vole à tene la cara cara.

Dete à Tistù una manatella di bumbò è messe una bella nota à nantu à u so carnettu.

Ma u duttore Mauxdivers fù ancu più stunatu u lindumane, quand'ellu entrì in la camara di a zitelluccia.

Quella surridia, s'era discitata in pienu pratu. I narcisi criscianu in giru à a tavula di notte, a cuverta era diventata un cuvartoghju* di vinche** ; una vena*** scema si stendia nantu à un tappettu. Èppò u fiore, u fiore chì primurava u più à Tistù, una rosula meravigliosa, chì ùn piantava di trasfurmà si, di spannà una fronda o un bocciulu, u fiore s'arrampicava à nantu à a testa di u lettu, longu à u cuscinu.

A zitelluccia ùn guardava più u suffittu ; avia l'ochji nantu à u fiore.

* édredon

** pervenches

*** avoine

A sera stessa, e so anche principionu à move-
si. A vita li piacia.